



Nohas and Salams

Written by Sabiha N H Jafri

Bismillahir rahmannir raheem

Contents

Zainab ke dil se poochho.....	Page 3
Hain Ali tasveere riqqat	Page 5
Boli Zainab chaley kahan Baba.....	Page 6
Qaid may mayyat padi hai.....	Page 7
Sakina ki aseeri.....	Page 8
Sughra ko intezaar hai.....	Page 10
Ummey Kulsoom.....	Page 12

Zainab ke dil se poochho

Vo Sham ki museebat
Zainab ke dil se poochho
Ashoor ki vo aafat
Zainab ke dil se poochho

Bachon ka bilbilana
Qaimo may aag lagna
Sajjad ka tadapna
Zainab ke dil se poochho

Bachi vo sehmi sehmi
Aur haye vo yateemi
Us par tamachey khana
Zainab ke dil se poochho

Bhai ki laash par vo
Amma ki aah o zari
Baba ka shab me aana
Zainab ke dil se poochho

Mushkilkusha ki beti
Rassi me baandhi jaye
Vo neel bazuon ke
Zainab ke dil se poochho

Vo Koofiyon ka majma

Bazar me vo jaana
Chaadar ka chheen jaana
Zainab ke dil se poochho

Paon me jis ke chhaaley
Vo tauq ko sambhaaley
Beemar ki museebat
Zainab ke dil se poochho

Tashtey tila ke andar
Ghaltaan vo qoon me sar
Vo chobey zulm lagna
Zainab ke dil se poochho

Zindaan ka vo andhera
Asghar ko yaad kar ke
Bano ka vo tadapna
Zainab ke dil se poochho

Bay warisi ka aalam
Vo sar ke gird maatam
Bachi ki vo shahadat
Zainab ke dil se poochho

Qurbaan ho Sabiha
Bibi ke sabr par tu
Islam ki hifazat
Zainab ke dil se poochho

Hain Ali tasveere riqqat

Hain Ali tasveere riqqat
Fatima qamosh hai
Sabr hi main hai masheeyat
Murtuza qamosh hai

Zalimo ne hai azeeyat
Jeeteji Zahra ko di
Roohay Ahmed ro rahi hai
Aasiya qamosh hai

Boli Fizza shaahzado
Maa ne qidmat bhi na li
Betoiyaan roti khadi hain
Aur Maa qamosh hai

Gir pade qadmo pe jab
Maa ke Hussain ibne Ali
Haath niklay do kafan se
Aur fiza qamosh hai

Al madad ay Sayyada
Imdaad ka ye waqt hai
Hai Sabiha ko bharosa
mudua qamosh hai

Boli Zainab chaley kahaan Baba

Boli Zainab chaley kahaan Baba
Chhod kar hum ko neemjaan Baba

Bhai Shabbar pachadey kha kha kar
Poochtey hain gaye kahaan Baba

Bhai Sarwar ka dum na ghut jaye
Kab se kartey hain vo fughaan Baba

Aaj bin baap ki hui hai hai
Teri dukhyari betiyaan Baba

Sath apne hamey bhi le chaliye
Aap jaatey hai ab jahaan Baba

Uth gaya sar say aap ka saya
Log ab dengey ghurkiyaan Baba

Bhooliyega na is ko mehshar mein
Hai Sabiha jo nohaqaan Baba

Qaid may mayyat padi hai

Qaid may mayyat padi hai
Binte Shah qamosh hai
Eik sakta sa hua hai
Neemjaan qamosh hai

Chupke kahti thi ye Zainab
Se Sakina baar baar
Dadijan ki aaj kyo
Aaho fughaan qamosh hai

Baap kay sar ko liye
Bachi ne aaqir jaan di
Imtehaan par imtehaan hai
Aur Maa qamosh hai

Kaan zaqmi gaal neeley
Aur gardan me rasan
Zulm ki bas inteha hai
Bibiyaan qamosh hai

Hukmay Hakim hai ke mayyat
Dafn ho zindaan me
Sar jhukaye haye Abid
Natavaan qamosh hai

Almadad ay chaar saala
Shaahzadi al madad
Hai Sabiha ko bharosa
Mudua qamosh hai

Sakina ki aseeri

Sakina ki aseeri
saari dunya se nirali hai
Kisi qaidi ki turbat to na hogi
Qaid qaney mei

Sakina mar bhi jaaye
To na zindaan se reha hogi
Sakina ki banegi qabr ek din
Qaid qaney mei

Pata kyon poochtay ho
Duqtar e Sarwar ki marqad ka
Ye Kaaba bekasi ka Shaam ke hai
Qaid qaney mei

Qiyamat tak vo ek shamey ibadat
Deen ki roshan hai
Vo Zainab ki namazey shab andherey
Qaid qaney mei

Sambhaley bediyaan Sajjad
Bano se ye kehte thhey
Ke Amma margayi behna hamari
Qaid qaney mei

Tamacho ke nishan gaalon pe

Aur gurdan me ek rassi
Dilaasa yu mila Bibi ko meri
Qaid qaney mei

Katey do hath nikley qabr se
Aur ye nida aayi
Bhateeji ko merey dey do mai aaya
Qaid qaney mei

Sabiha dil pe kya guzri
Haram kay rab hi jaaney hai
Ke ek shama nahin roshan karey jo
Qaid qaney mei

Sughra ko intezaar hai

Sughra ko intezaar hai
Uttho Hussain ghar chalo
Zainab ki ye pukar hai
Uttho Hussain ghar chalo

Shaney kata ke so gaye
Bhaiyya bhi ham se chhut gaye
Pusht meri figaar hai
Uttho Hussain ghar chalo

Barchhi jigar pe kha gaye
Akbar jawaan mar gaye
Ujdi hui bahaar hai
Uttho Hussain ghar chalo

Jhoola jhulati hai Rabaab
Betey ki lekey dil me yaad
Asghar ka intezaar hai
Uttho Hussain ghar chalo

Dulhaa ki laash lut gayi
Maang hai qaak me bhari
Kubra ka haal e zaar
Uttho Hussain ghar chalo

Bachey merey bichhad gaye
Pyasey hi run me so gaye

Dil mera beqaraar hai
Uttho Hussain ghar chalo

Rassi me bazu thha bandha
Chheeni hai sar se bhi rida
Ja key watan karu main kya
Uttho Hussain ghar chalo

Tap me vo dohri bediyaan
Tauq galey me thha giraan
Abid ko chalna baar hai
Uttho Hussain ghar chalo

Bhaiyya Sakina mar gayi
Jaur o sitanm na seh saki
Qaid me hi mazaar hai
Uttho Hussain ghar chalo

Tum bin waetan na jaoongi
Ma ko na mu dikhaoongi
Zainab ko intezaar hai
Uttho Hussain ghar chalo

Aayi Sabiha ye nida
Qabre Aqi se alvida
Rokar bahan na yu rula
Uttho Hussain ghar chalo

Ummey Kulsoom

Dukh bohat tum ne behna utthaye
Ummey Kulsoom
Thhey ye Zainab ke lashey pe naaley
Ummey Kulsoom

Baap ka jab uttha sar se saya
ranj paya
Bhai Shabbar ka phir gham utthaye
Ummey Kulsoom

Haye Abbas ka thha sahara
Vo bhi toota
Nahr par jaakey wapas na aaye
Ummey Kulsoom

Rozey Ashoor Shabeer pyasey
kis jafa se
Beqata vo gaye run me maarey
Ummey Kulsoom

Dushmano ko na thha qof e dawar
Chheeni chadar
Phir laeno ne qaimay jalaye
Ummey Kulsoom

Koofa o Sham me phir khuley sar

zulm sehkar
Qaid e zindaan ke sadmey uthhaye
Ummey Kulsoom

Laut kar jab Madiney ko behna
Wapas aaye
Rotey rotey hi jannat sidharey
Ummey Kulsoom

Shorey girya hai jannat me barpa
Ay Sabiha
Fatima ko hain Hyder sambhaley
Ummey Kulsoom